

Patriotisme Mencakupi Komitmen Dan Semangat Bangunkan Negara - Lam Thye Bernama
23 Ogos, 2011

KUALA LUMPUR, 23 Ogos (Bernama) -- Patriotisme bukan sekadar mengibarkan bendera, beruniform kemas serta aksi kawad yang tersusun rapi dengan gaya segak dan wajah yang serius semasa menyambut ulang tahun kemerdekaan.

Sebaliknya, Anggota Pemegang Amanah Yayasan 1Malaysia Tan Sri Lee Lam Thye berkata patriotisme merupakan satu komitmen, suatu perasaan yang mendalam, suatu semangat yang dihayati serta menyerlahkan apabila dituntut keadaan.

"Sifat patriotik harus merangkumi usaha-usaha yang dapat meningkatkan martabat bangsa dan negara serta menyumbang kepada ketamadunan manusia seperti perkembangan ilmu pengetahuan, keadilan sosial, keamanan dan kesejahteraan sejagat," katanya semasa berucap pada Sambutan Bulan Patriotisme Sekolah Menengah Kebangsaan (SMK) Seri Hartamas di sini, hari ini.

Beliau berkata bagi memastikan semua warga dapat hidup secara aman dan sejahtera, semua lapisan masyarakat mempunyai peranan masing-masing bagi memainkan peranan untuk membangunkan negara.

"Saya amat menghargai inisiatif yang diambil oleh SMK Seri Hartamas untuk menganjurkan majlis ini sebagai aktiviti pengisian bagi mewujudkan kesedaran di kalangan pelajar sekolah mengenai erti sambutan bulan kemerdekaan," katanya.

Lee berkata generasi muda, yang perlu dididik untuk menjadi patriotik dan bersemangat nasionalisme, harus menghormati dan mencintai Jalur Gemilang.

Penganjuran kempen 'Cintakan Bendera Kita' di sekolah-sekolah membolehkan pelajar memahami pentingnya bendera kebangsaan dan maksud di sebaliknya, kata beliau.

Beliau juga menyarankan rakyat Malaysia yang mempunyai latar belakang bangsa dan agama berlainan supaya membaharui azam untuk membina sebuah negara yang harmoni, bersatu padu dan progresif yang boleh menjadi kemerdekaan milik bersama.

-- BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsgeneral.php?id=609822>